



Broj: 01-01-1466-4 -I /09
Sarajevo: 26.01.2010. god.

Na osnovu člana 25.stav (1) tačka f) Zakona o konkurenciji ("Službeni glasnik BiH", br. 48/05, 76/07 i 80/09), a po zahtjevu privrednog subjekta Predstavništvo kompanije JT International a.d. Senta u Bosni i Hercegovini, Mehmeda Spahe 26/III, 71000 Sarajevo, primljenog 08.12.2009.godine pod brojem 01-01-26-1466-I/09, Konkurencijsko vijeće, na 101.sjednici održanoj dana 26.01.2010. godine donijelo je

MIŠLJENJE

Privredni subjekt, Predstavništvo kompanije JT International a.d. Senta u Bosni i Hercegovini, Mehmeda Spahe 26/III, 71000 Sarajevo (Podnosilac zahtjeva), podnio je Konkurencijskom vijeću Zahtjev za davanje mišljenja po pitanju ocjene usaglašenosti odredbi nacrta Ugovora sa kriterijumima kojima su definisana zabranjena konkurencijska djelovanja odnosno zabranjeni sporazumi, ugovori, pojedine odredbe sporazuma ili ugovora u skladu sa Zakonom o konkurenciji (Zakon o konkurenciji).

Uvidom u podneseni zahtjev Konkurencijsko vijeće je utvrdilo da je isti potrebno dopuniti i precizirati, te je zatražilo dopunu dana 09.12.2009.godine dopisom broj: 01-01-26-1466-2-I/09, nakon čega je Podnosilac zahtjeva isti dopunio dana 16.12.2009. godine dopisom broj: 01-01-26-1466-3-I/09.

Podnosilac zahtjeva navodi da su proizvodi Japan Tobacco International (JTI) prisutni na tržištu duži niz godina, a u martu 2009. godine kompanija je otvorila i Predstavništvo za Bosnu i Hercegovinu sa sjedištem u ulici Mehmeda Spahe 26/III, 71000 Sarajevo.

JTI ima namjeru zaključiti ugovor o pružanju usluga izlaganja cigareta (Ugovor) sa određenim lancem maloprodajnih objekata u BiH. Takav ugovor bi imao za predmet izlaganje cigareta JTI-a u okviru dispenzera namjenjenih za prodaju i izlaganje cigareta svih proizvođača duvanskih proizvoda. U toku pregovora, a uslijed zajedničke namjere da saradnja JTI-a i potencijalnog pružaoca usluga potraje i ima dugoročnu perspektivu, došlo se na ideju da se sam čin produženja Ugovora za neki naredni period predvidi na slijedeći način i navodi:

"Trajanje ugovora"

Član 2.

2.1. Ovaj ugovor stupa na snagu _____i važi do_____godine, uz mogućnost sporazumnog produženja pisanim putem.

2.2. Po isteku ovog ugovora ustanovljava se pravo prvenstva na produženje ugovora u korist JTI-a u odnosu na druge potencijalne ugovarače sa istom ili sličnom sadržinom, pod uslovima iz najpovoljnije ponude koja bude ponuđena pružaocu usluge i koja će biti dostavljena i zvanično dokumentovana pisanom izjavom pružaoca usluge upućenom JTI-u.

2.3. Pružalac usluge je dužan da sprovede postupak prikupljanja ponuda drugih potencijalnih ponuđača i da pošalje JTI-u pisanu izjavu sa zvanično najpovoljnijom ponudom najkasnije do 15.novembra 2010.godine, koja dostavljena ponuda će se smatrati konačnom ponudom pružaoca usluge na produženje ugovora u korist JTI-a i o kojoj ponudi će se JTI izjasniti u roku od 15 dana od dana prijema iste.

2.4. U slučaju da pružalac usluge ne dostavi ponudu JTI-u najkasnije do pomenutog roka smatraće se da ponude drugih potencijalnih ugovarača sa istom ili sličnom sadržinom nije bilo, te ugovorne strane zadržavaju pravo da započnu i okončaju direktne pregovore najkasnije do 15. decembra 2010.godine."

Podnosilac zahtjeva traži mišljenje od Konkurencijskog vijeća po pitanju usaglašenosti gore navedenih odredbi nacрта Ugovora sa kriterijumima kojima su definisana zabranjena konkurencijska djelovanja odnosno zabranjeni sporazumi, ugovori, pojedine odredbe sporazuma ili ugovora u skladu sa Zakonom.

Članom 2.stav (1) Zakona je propisano da se Zakon primjenjuje na sva pravna i fizička lica koja se posredno ili neposredno bave proizvodnjom, prodajom roba i pružanjem usluga, učestvuju u prometu roba i usluga i koja mogu svojim djelovanjem sprečavati, ograničavati ili narušavati tržišnu konkurenciju na cijeloj teritoriji Bosne i Hercegovine ili na značajnom dijelu tržišta.

Članom 4. stav (1) Zakona propisano je da su zabranjeni sporazumi, ugovori, pojedine odredbe sporazuma ili ugovora, zajednička djelovanja, izričiti i prešutni dogovori privrednih subjekata, kao i odluke i drugi akti privrednih subjekata koji za cilj i posljedicu imaju sprečavanje, ograničavanje ili narušavanje tržišne konkurencije na relevantnom tržištu, a koji se odnose na:

- a) direktno ili indirektno utvrđivanje kupovnih i prodajnih cijena bilo kojih drugih trgovinskih uslova;
- b) ograničavanje i kontrolu proizvodnje, tržišta, tehničkog razvoja ili ulaganja;
- c) podjelu tržišta ili izvora snabdijevanja;
- d) primjenu različitih uslova za identične transakcije sa drugim privrednim subjektima, dovodeći ih u nepovoljan položaj u odnosu na konkurenciju;

e) zaključivanje takvih sporazuma kojima se druga strana uslovljava da prihvati dodatne obaveze koje po svojoj prirodi ili običajima u trgovini nisu u vezi sa predmetom sporazuma. Konkurencijsko vijeće ne može bez prethodno provedenog postupka ocijeniti da li su odredbe člana 2. nacrtu Ugovora, za koje je traženo mišljenje, u skladu sa odredbama Zakona o konkurenciji.

Ovo mišljenje se ne odnosi na sve odredbe nacrtu navedenog Ugovora, nego isključivo na odredbe nacrtu Ugovora, koje za cilj i posljedicu imaju sprečavanje, ograničavanje ili narušavanje tržišne konkurencije na relevantnom tržištu.

Dostavljeno:

1. Naslov
2. U spis
3. Arhiva

Predsjednik

dr.Stjepo Pranjić